

"Era di maggio": Alessio Boni al puarte in sene al Mittelfest il taramot dal Friûl

Il spetacul, in program ai 25 di Lui aes 21.30 al Verdi di Gurize, al sarà une prime assolute, risultât de lungje colaborazion tra il festival e la ARLeF, chest an in coproduzion cu la innomenade Orchestra La Corelli

Fra Mittelfest e la ARLeF - Agenzie regionâl pe lenghe furlane - la colaborazion, an par an, e devente simpri plui vivarose e prolifiche. Par chest 2026, tal 50^m dal taramot che al scjassà il Friûl, e puatarà al public une gnove, grande, prime assolute: "Era di maggio", in program par sabide ai 25 di Lui, aes 21.30, al Teatri Verdi di Gurize.

Un spetacul che al sarà une vere experience immersive, graciis a Alessio Boni, che al darà vôs al test scrit di Flavio Santi, e aes musichis originâls di Damiano Drei, eseguidis de Orchestra La Corelli, direzude di Jacopo Rivani. Vôs e musiche, adun, come intune danze, a fasaran jentrâ i spetatôrs intun paisaç sonôr vîf e cinematografic, anje in graciis de metude in sene curade di Giacomo Pedini, diretôr artistic dal Festival.

«La colaborazion tra la ARLeF e il Mittelfest e à aromai segnât un troi che, ancjemò une volte, al dimostre cemût che culture e lenghe a puedin contâ la identitât di un popul. Tal cincuantessim dal taramot dal 1976, chest al è un spetacul che al jude ducj a ricuardâ. In cheste maniere, di une bande nus jude a tignî cont lis nestris lidris e, di chês altre, a trasmeti aes gnovis gjenerazions il valôr di une comunitât che, dopo di chês tragjedie, e à savût tornâ a jevâsi plui fuarte e unide che no prime», al à vût dit Eros Cisilino, president de ARLeF.

«In chescj agns la colaborazion tra il festival e la ARLeF e je stade salde e une vore impuartante – al à marcât Giacomo Pedini, diretôr artistic di Mittelfest –, a partî de comunicazion in lenghe furlane che o vin curât e volût pal Mittelfest e che le calcolin fundamentâl par chest teritori. Dopo dai grancj spetacui fats insieme, tal 2026 nol podeve no nassi un ricuart, un moment di rît e di memorie peât al cincuantessim dal taramot. Cussì al è nassût “Era di maggio”, come une consequence naturâl di animis tra il dialic costruît cu la ARLeF e il so diretôr Cisilino e, in chest câs, cun Flavio Santi, cu la Orchestra La Corelli e, clâr, cun Alessio Boni che al darà vôs e cuarp ae narazion di chês zornade che e à segnât la storie e il mudament dal Friûl».

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<

«Al sarà un viaç dentri di une zornade normâl, come tantis altris, che si dimostrerà ecezionâl», al à contât il stes Santi, docent ae Università dell'Insubria, furlan di divignince e za vincidôr dal premi "Viareggio-Rèpaci" pe poesie tal 2021, ma ancje autôr di dôs racueltis di poesiis par furlan. Lui, ai 6 di Mai dal 1976, ancje se une vore piçul, «o jeri cjase. O vevi a pene trê agns. Gno pari mi à contât che o segnavi i mûrs cul dêt e i domandavi parcè che si movevin». Une olme te memorie che no je mai mudade in ricuart, par vie che o jeri masse piçul. Un di chei episodis che a rivin come un lamp a sbregâ une zornade che e pareve come chês altris e che, invece, a cambiin dut, par tancj di lôr. «Cundut che o jeri frutin, alc di chês di mi è simpri restât dentri e cussì, se gno pari e i miei barbis a àn doprât il ciment par tornâ a fâ sù la cjase sdrumade dal dut, jo o ai cirût di tornâ a meti impins chei ricuarts cu lis peraulis. Dopo che lu ai fat un pôc cun cualchi poesie e romanç tai agns passâts, pe prime volte o ai scrit un test organic. No esclût che al podarès jessi dome il prin pas par un romanç dedicât al teme».

In part une autobiografie, ma no dal dut («mi soi immaginât un pôcs di agns plui grant»), "Era di maggio" - coproduzion Orchestra La Corelli e Mittelfest2026 in colaborazion cu la ARLeF - e conte chês zornade cui voi di un fantat a pene adolescent. Dut al va indenant come simpri, fra i bancs di scuele, i compits par cjase, i salts tal flum intune Vierte une vore cjalde. Il pinsîr al è za aes vacancis estivis che a son simpri plui dongje. Aes 9, il berli dal taramot al scjasse il cidin de sere. Par pôc mancûl di un minût - che al pâr infinît - dut al treme. Chês zornade normâl e je diventade ecezionâl. La tiere e à glotût cuasi 1000 vitis e lassât 45 mil personis dome cuntun sotet: lis stelis.

I biliets a son a disposizion su: www.vivaticket.com.

Udin, ai 20 di Lui dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<